

東明縣新志

天津趙元禮



三孝廉傳

戴元

進士本邑人

余攷古里選制其舉孝廉也蓋以行也後則文焉文不與于行而行亦往往得之吾邑諸先達行義文章乘不勝書以余耳目所稔者得三人焉庶幾乎古人之風矣張五友號欽虞萬歷戊午科舉人會魁尙友之胞弟也澹寧自矢精數學閤戶著書曰日益錄修城量計磚數不差累黍隱逸自好行年八十而誦讀不輟

梁仁傑號斗南崇禎丁卯科舉人天性醇謹不苟取予然于邑安危利弊又輒抗言無隱恤孤振貧自禮服外未嘗衣帛仕漢陽節推明肅衙蠹慈多平反甲申挂冠教授生徒不仕著有學庸日抄行世


盛期號存鴈以軍籍中崇禎癸酉科開州舉人廉潔節儉自食其力嘗以素餐戒諸子高臥不仕戊子東寇焚劫獨望先生宅引去按君蘇京爲同門友延至署餽數百金弗受當世高其節所著纍纍多軼云

戴元論曰自有邑來內廟貳外中丞藩臬皆彪炳一時壬戌後或爾扼風氣官雖不顯而騰聲者衆焉如三公者可爲真孝廉而司李則又移孝作忠矣

劉中丞公小傳

國朝 郅煥元 進士 蒲城人

劉懷恕字心田東明人萬歷丁丑進士初任長洲令修吳門堤吳人賴之入拜御史彈劾不避權貴未幾病請再出按淮陽三月而逐三墨吏按晉條畫邊事尤多遠猷值兩京災傷公奏請賑濟存活饑民無算督理九門工成例當內轉公辭不居久之始陞大理丞執兩尊人喪哀毀骨立家居二十載不赴補已用薦廷推爲郎陽撫治都御史未幾卒崔太宰景榮銘其墓曰法以廉介以嚴風采嶽嶽深以潛蓋確論也



壽光令袁公傳

國朝部獻珂進士長
垣人

袁葵字向一河內其別號也東明人世有隱德公坐而厚重寡言穎悟不羣稍長苦心緝學爲文雄駿古博自成一家言應童子試三冠其軍遂食餽時值恩選督學左公首錄公以大受期之丁卯舉于鄉辛未成進士出方公逢年之門文名籍甚時張庶常溥馬庶常世奇皆傾心下之選授山西夏令廉不受一錢而剔梳不遺餘力教行而民化之流賊薄郊關設奇制伏斬其首謀賊宵遁士陣不尋丈賊馬數萬卒不得逞夏人以公爲命而洪洞劉御史令譽者素才公洪洞乏員陰白當道調繁洪洞夏人號泣走二千里上書略云百年父老相傳從古無此好官譬如人慈母卵翼哺濡其子巨靈者奪爲他人母巨靈蓋指劉御史也書上不報夏人匿輿馬於學舍與洞役格鬪擁署不得行抵洞而洞遭凶歲公請蠲租一年勸富民平糶別立社倉贍飢民不足者輒書印券貸之有力者無不樂輸早夜詣煮粥所見棄兒子道命收養濟院哺之每出民輒放棄兒子道待收養者以百數民不知有凶歲其收養兒長成者至今以袁爲氏如新息人

之稱賈父焉未幾奉張太儒人諱以歸劉御史聞之輒撫然曰羊舌氏失怙矣服除以太公春秋高不欲離膝下太公強之始除補爲山東壽光令壽濱海疲而悍王祿鞭笞不敷公緩催科不腴民媚豪貴擊一大猾坐殺人者抵死其貴人力持之不少撓以所治夏與治洞者治壽循聲甲二東日聞輦下言官凌給事思薦請加戶科銜督山東省餉公寓書所知曰齊民瘠矣一夫不忍督矧矧六郡以市官耶議遂寢已念太公不已遂謝告以歸歸則杜門却掃色事太公如嬰兒設義學義田以贍寒士之無膏火者當是時歲大稔公有餘粟盡出以賑其乏死無葬者具棺木瘞之士寇竊發公首倡璧城議百姓難於慮始而公力持之告成功東邑三被兵變而邑不受屠有識者方服公早見也公日夜練鄉勇措糧餉以爲固圉計寇至佐邑令寢食城上爲監紀同知顏胤紹畫方略賊不敢逼東明賴以獨完未幾遭太公之喪哀毀骨立踰年胞弟疾篤徒行往與訣歸謂孺人曰父母生吾三人兄則已矣寡嫂無嗣吾夫婦以所生兒嗣之卒又弗嗣祇吾一弟在弟死吾何樂獨生悲涕不已遂中病坐是竟不起易簀連呼聖人召我

舉手作拱揖而逝年僅四十有三公生有至性事父母無疾言遽色對屋漏如鬼神好讀書自成童至貴無曠日三爲令尹歿之日至不能裹葬事其在任誓城隍曰神不愛楮錢愚民修祈禳乎何用官不愛銀錢小民求勢要其何爲告文廟曰宗宋而去其黨參漢而用其醇大惡當除兩觀之誅具在武備惟豫萊兵之却可師又鐫趙清獻焚香告天彭澤解組及笑罵由人等圖于署題詩以自警歸則營亭曰吾愛銘曰我在萬惟三情真七可一仁者爲能愛信斯惟有吾聯云存心凜敬恕應物佩韋弦嗚呼是可知公之自盟者素矣天假以年卽濂溪河洛之業豈可量哉著有瀆園文集若干卷公歿後二十年三邑士庶請祀名宦復祀鄉賢論曰余常仕山西山東以事過三邑父老爲余言袁公未常不潛潛泣下也太原遇一老將舊出公部下言公夏縣破賊狀輒感激起舞往見馬太史世奇言公記奏宰相劄云流寇以牧豎揭竿徜徉天下陷名城啖官民主上之鉞能加殿陛而遠不及鎮將某小吏家食惟遵諭勸有司修城隍防不虞匹夫保鄉里止此矣天下憂方巨則師相任也條六事俱石畫嗟乎國家誠得公輩數人

用諸祕要以治天下不既治耶

陳公守城傳

國朝李臺邑人

陳公諱延祚字慶餘爲河南按察司副使其猷公嗣子性豪邁年弱冠爲諸生以任俠聞於天下交游遍海內一時知名之士沛縣閭爾梅郊縣全廷舉廣平李仲熊江南何培人陳洪範等皆爲意氣友往來主其家時明季亂每談天下事輒以不得蕩平爲憤出二千金助餉以紓其不平之志崇禎甲申二月詔求異等邊材不拘資格起授節鉞直撫徐標知其材保舉貢士以聞命未下而京師陷公遂避亂隱於鄉旣而闖逆僧大號設僞官僞令王秉純貪求無藝立炮刑以拷不應已者邑宦張力劉璧星范春駿李允樟辛廣慈等合謀倡衆直造其堂殺之遺孽僞總鍊部總程抱六張夢熊等懼其逼已且利五宦之所有也合黨執五宦轉送懷慶逆營五宦俱於途中罵賊死縣無主者兩月羣惡橫人不堪其毒羣推公署縣事恐其不應厥任也請前憲司南洙源徵之公曰時勢至此義不容不出矣當是時程張等十八人各擁重兵以自固北有張賊嘯聚破開州南下南有叛兵窺渡黃河東馬興文之寇非時侵擾西李如琮之叛爲賊聲援

公乃陽與程張等結懽以備他寇爲名募精兵數十百人調四鄉健勇以爲戰兵旬餘日度賊之不已疑也張晏誘至伏壯士盡殲之脅從者靡然而散猶有李如琮爲賊左臂慮其不靖獻祕計於總鎮王某俾若行縣者然公以兵往會誑之出城而馘焉又恐潰卒煽擾擇四鄉青衿中有德望者或布衣忠誠者委以總練授之方略俾各自爲守故比戶皆兵而盜賊屏迹矣廓清之力卽垣邑亦且賴之洎順治戊子山東李化鯨逆亂陷曹州曹縣定陶等處率衆數十萬直抵東明縣尹曹良輔集衆計羣以公對曹暨衆詣公而請曰劇寇厭境余雖忝主邑事才疏不克禦患敢以城守累公公曰城之不守余亦有不利焉固無容辭但共事非一人邑中半余親故倘志有不協毋乃敗而公事乎曹顧衆曰法令不肅兵家大忌也况值危急諸君方以身家委陳公孰非自爲者爾乃或違耶衆諾之曹曰賞罰號令惟公之命余行其成而已敢有梗玩者按軍法論遂分曹良輔督東門孝廉董三晉督西門孝廉崔拱乾督北門延祚督南門諸生分督諸陣各率民兵家人赴汛固守乃布畫其略傳令饋餉運器械護柵欄進退行止開閉

出入無不井井有條悉中機宜俄而賊衆大至環城數里百道急攻鉛飛矢流如蝗蔽天公晝夜策應者旬有五日援師至圍始解當賊初攻東明時以爲城小兵寡至則立破耳旣而守禦多方賊稍沮且法令嚴明信賞必罰雖親故不稍假故守陴之衆林立縱或有傷寂然無聲賊故莫窺其虛實而城得以全先是賊之未犯東明也公逆知有變招壯士五十餘人養於家率皆強悍死戰之夫未幾有城守事凡挫賊鋒搶賊炮皆奮勇倡先多得其力計前後士卒糧糗犒賞銀牌紬緞羊酒等費約數千金皆措辦於己不動帑不擾民其輕財尙義又如此他如捐重貲以修聖廟聯社友以課文學卹董喪以敦交誼煮粥輸粟掩骼施地種種懿行家有實行紀錄茲特詳其未備者云

贊曰公兩次守城所攝者尺寸之柄耳乃能全孤城於危急存亡之秋非其才智大有過人者乎倘俾以專閫之任扶危定傾樹勳雲臺皆事之可預信者惜乎未竟其用也辛推子以管葛擬之有以也夫

李將軍平閩傳

朝國李欽邑人

李將軍者諱璉字楚白驍勇好義弱冠喜騎射初授梁山營把總累遷江南提標中營守備康熙戊午當鄭芝龍遺孽之寇閩也圍泉州福建楊提督知其材請署援勦福建右營遊擊從征復惠安縣奮勇倡先斬首七百三十級賊與官兵持于洛陽橋將軍廉訪土人得捷徑可抵逆營背白諸督帥帥嘉其謀令獨往時中秋後九日夜將半月靜風寒秋聲鏗鏘然率姪朝臣及部下士得百人啣枚疾馳暗渡陳山壩遶西南三十里抄賊寨後多持鼓角突以炬燒其壘大兵接應夾攻之賊自蹂躪斬六百餘級船破溺者無算遂解泉州圍紀功加二等尋進兵江東橋賊沿江布列斷橋雄踞將軍曰賊新破膽當乘其未成列擊之率姪朝臣身先士卒直衝橫突斬首四百級賊潰揚航走復以炮追之船多沉遂奪江東橋由是傳之者每以打洛陽江東二橋爲公首功云己未隨姚楊二督帥于下坑山攻賊提戈大呼所遇輒披靡直追至果塘玉州等寨斬首千有百餘級生擒將卒百二十三人又隨平南將軍賴政賊于東尾果塘山多所俘獲至

明年庚申以火攻奪獅子山會七路兵合攻陳洲馬洲十九寨俱下之斬首四千級報大捷紀功加十九等遂勝乘復海澄率朝臣斬首一千一百級擒僞總兵楊告等一十一員紀功加三等賊大懼思畔歸督帥謀招撫之而難其人也公奉令駕八槳船出海澄港口冒險接撫僞總兵吳桂羅士鈐併賊弁七百餘員兵一萬三千餘名紀功加七等卽奉令以吳羅爲前導進攻廈門諸逆島悉克之閩遂平先是將軍戰于果塘也賊以炮傷其股割袍裹之猶力戰不少輟故謀皆有成共斬首四千級累功至三十一等

授左都督一拜他喇布勒哈番迨參軍於楚之兩桂也文武和衷調濟利弊士民爲作與人誦丙寅復序績

引見 賜御饌菓 特授嚴州府副將併姪朝臣

授左都督江南提標右營遊擊將軍卒於嚴州署

授榮祿大夫 封三世如其官子耿臣少亡以子貴

誥贈昭勇將軍孫籙任湖廣澧州營參將曾孫時擴江西萬安營都司蓋皆襲公之功云論曰古之箴武臣者曰不惜命旨哉言之質而約也將軍少未習韜略諸書而身歷二十餘戰悉中機宜無少退挫者抑何與兵貴神速相符乎迹其潛渡陳山冒險海澄皆人所觀望罔敢前者獨毅然任之而克有成功無他不惜命故也爲人臣者以片念之遲迴而失機坐敗非皆將軍之罪人也哉

